TANGAZO LA SERIKALI Na. 582 Lililochapishwa Tarehe 23/9/2022

SHERIA YA USIMAMIZI WA MAZINGIRA (Sura Ya 191)

KANUNI

(Zimetungwa chini ya Kifungu cha 74 (2) na 230(2) (i))

KANUNI ZA USIMAMIZI WA MAZINGIRA (USIMAMIZI NA UDHIBITI WA KEMIKALI ZINAZOMONG'ONYOA TABAKA LA OZONI NA HIDROFLUOROKABONI) ZA MWAKA 2022

MPANGILIO WA KANUNI

Kanuni Jina

SEHEMU YA I MASHARTI YA UTANGULIZI

- 1. Jina.
- 2. Matumizi.
- 3. Ufafanuzi.
- 4. Lengo.

SEHEMU YA II ZUIO LA KEMIKALI NA VIFAA VINAVYODHIBITIWA

- 5. Zuio la Kemikali Zinazomong'onyoa Tabaka la Ozoni na Hidrofluorokaboni.
- 6. Wajibu wa kuzingatia masharti ya Kanuni.
- 7. Tarehe za zuio la kemikali zinazodhibitiwa.
- 8. Udhibiti wa uingizaji nchini wa baadhi ya kemikali na vifaa.

- Q Zuio la matumizi ya haloni.
- 10 Kitengo cha Taifa cha Ozoni.

SEHEMU YA III UZINGATIAJI NA UTEKELEZAJI

- 11 Mamlaka ya wakaguzi wa kemikali.
- 12 Mamlaka ya wakaguzi wa mazingira.
- 13. Makosa yanayohusiana na mkaguzi wa kemikali au mazingira.
- 14. Amri ya dharura ya kulinda mazingira.
- 15. Majukumu ya vitengo vya kisekta vya mazingira.
- 16. Majukumu ya Mtaalamu wa Usimamizi wa Mazingira wa Mkoa.
- 17 Majukumu ya Ofisa wa Usimamizi wa Mazingira.
- 18. Kiasi na kiwango cha uingizaji nchini au usafirishaji nje wa kemikali au vifaa.
- 19 Maombi ya kibali.
- 20. Miundombinu sahihi na vifaa vya kutosha kabla ya kibali kutolewa.
- 21. Kumbukumbu za kemikali zinazodhibitiwa.
- 22. Kumbukumbu za vifaa vinavyodhibitiwa.
- 23. Wajibu wa kutunza kumbukumbu.
- 24. Uthibitishaji wa forodha na uwekaji alama ya utambulisho.
- 25. Elimu na mafunzo kwa umma.
- 26. Motisha kwa kupunguza na kusitisha matumizi ya kemikali na vifaa vinavyodhibitiwa.
- 27. Majukumu ya Maofisa Forodha.
- 28. Kuendana na mabadiliko ya teknolojia.
- 29. Wajibu wa kutoa taarifa.

SEHEMU YA IV VIFAA VYENYE KEMIKALI ZINAZODHIBITIWA

30. Ukarabati wa vifaa vyenye kemikali zinazodhibitiwa.

- 31. Sifa za kukarabati vifaa vyenye kemikali zinazodhibitiwa.
- 32. Majukumu ya wamiliki wa biashara.

SEHEMU YA V UTEKETEZAJI WA VIFAA VYENYE KEMIKALI ZINAZODHIBITIWA

33. Uteketezaji wa Vifaa vyenye Kemikali zinazodhibitiwa.

SEHEMU YA VI MASHARTI MENGINEYO

- 34. Makosa yanayotendwa na kampuni.
- 35. Amri za mahakama.
- 36. Rufaa.
- 37. Kufutwa kwa Tangazo la Serikali Na. 240 la Mwaka 2007.

MAJEDWALI

SHERIA YA USIMAMIZI WA MAZINGIRA (SURA YA 191)

KANUNI

(Zimetungwa chini ya Kifungu cha 74 (2) na 230(i))

KANUNI ZA USIMAMIZI WA MAZINGIRA (USIMAMIZI NA UDHIBITI WA KEMIKALI ZINAZOMONG'ONYOA TABAKA LA OZONI NA HIDROFLUOROKABONI) ZA MWAKA 2022

SEHEMU YA I MASHARTI YA UTANGULIZI

Jina

 Kanuni hizi zitaitwa Kanuni za Usimamizi wa Mazingira (Usimamizi na Udhibiti wa Kemikali Zinazomong'onyoa Tabaka la Ozoni na Hidrofluorokaboni) za Mwaka 2022.

Matumizi

- 2. Kanuni hizi zitatumika kwa:-
 - (a) Watu wote wanaoshughulikia au kutumia kemikali zilizodhibiwa au vifaa vyenye kemikali, vilivyotengenezwa kwa au vinavyotegemea au vilivyosanifiwa kuwa na kemilkali zinazodhibitiwa ambazo:-
 - (i) zina uwezo wa kuharibu molekyuli za ozoni kwenye eneo la anga juu ya hewa ya kawaida pamoja na vifaa

- vilivyoorodheshwa kwenye Jedwali la Kwanza; au
- (ii) zina uwezo mkubwa wa kusababisha ongezeko la joto duniani kama zilivyoorodheshwa kwenye Jedwali la Pili.
- (b) mzalishaji, mwingizaji nchini, msafirishaji nje ya nchi au msambazaji yeyote wa kemikali zinazomong'onyoa tabaka la ozoni au Hidrofluorokaboni zenye uwezo mkubwa wa kuchangia ongezeko la joto duniani.
- (c) mzalishaji, msafirishaji nje ya nchi, mwingizaji nchini yeyote wa teknolojia inayotumia kemikali zinazomong'onyoa tabaka la ozoni au Hidrofluorokaboni zenye uwezo mkubwa wa kuchangia ongezeko la joto duniani.
- (d) kampuni au mtu yeyote anayekarabati majokofu, viyoyozi, viyoyozi jongevu ikiwemo teknolojia na vifaa vingine vinavyotumia kemikali zinazomong'onyoa tabaka la ozoni au Hidrofluorokaboni zenye uwezo mkubwa wa kuchangia ongezeko la joto duniani.
- (e) kampuni au mtu yeyote anayetumia au kukarabati vifaa vya kuzima moto vinavyotumia kemikali zinazomong'onyoa tabaka la ozoni au

Hidrofluorokaboni zenye uwezo mkubwa wa kuchangia ongezeko la joto duniani.

Ufafanuzi

3. Katika Kanuni hizi, isipokuwa pale ambapo muktadha utaelekeza vinginevyo-

Sura 191

"Sheria" maana yake ni Sheria ya Usimamizi wa Mazingira;

Sura 182

"Mkaguzi wa Kemikali" maana yake ni maana yake ni mkaguzi aliyeteuliwa kwa mujibu wa kifungu cha 36 cha Sheria ya Usimamizi na Udhibiti wa Kemikali Viwandani na Majumbani;

"klorofluorokaboni (pia itajulikana kwa kifupisho cha CFC)" maana yake ni klorofluorokaboni zenye halojeni kwa kila molekyuli ambayo ina atomu za kaboni moja, mbili au tatu;

"vifaa vinavyodhibitiwa" maana yake ni vifaa vyenye,
au vilivyotengenezwa au
vinavyotegemea au vilivyosanifiwa
kutumia kemikali zinazodhibitiwa zenye
uwezo wa kuharibu molekyuli za ozoni
kwenye eneo la anga juu ya hewa ya
kawaida pamoja na vifaa

vilivyoorodheshwa kwenye Jedwali la Kwanza;

"kemikali zinazodhibitiwa" maana yake ni kemikali zilizoorodheshwa kwenye Jedwali la Pili na la Tatu, ama zikiwa peke yake au zikiwa katika mchanganyiko ikiwa ni pamoja na kemikali zilizotolewa kwenye vifaa kwa lengo la kusafishwa ili kuzirudisha katika ubora wake, zilizorejelezwa au zilizorejeshwa isipokuwa kama itaelezwa vinginevyo;

"kituo cha forodha" maana yake ni eneo la kituo cha forodha lililoainishwa na Waziri chini ya Kifungu cha 12(1)(b) cha Sheria ya Usimamizi wa Forodha ya Jumuiya ya

iliyofanyiwa marejeo Mwaka 2019;

Afrika Mashariki ya Mwaka 2004

"Mkurugenzi wa Mazingira" maana yake ni Mkurugenzi wa Mazingira aliyeteuliwa chini ya kifungu cha 14 cha Sheria

"mtumiaji" maana yake ni mtu yeyote anayenunua, kupokea na kutumia kemikali au vifaa vinavyodhibitiwa kama vile karakana ya kukarabati majokofu na viyoyozi;

Sura

- "Mkaguzi wa Mazingira" maana yake ni mkaguzi aliyeteuliwa au kutajwa chini ya au kwa mujibu wa kifungu cha 182 cha Sheria;
- "uwezo wa kuchangia ongezeko la joto duniani" kuhusiana na kemikali zinazodhibitiwa, maana yake ni mchango wa jumla wa ongezeko la joto duniani unaotokana na uzalishaji wa gesi taka wa kizio kimoja cha gesi husika sawa na kizio kimoja cha gesi inayorejewa, kabonidioksidi, ambayo imepewa thamani ya 1;
- "hidrofluorokaboni (pia itajulikana kwa kifupisho cha HFC)" kuhusiana na kemikali zinazodhibitiwa maana yake ni hewa ukaa/mchanganyiko unaojumuisha hidrojeni, florini, na atomu za kaboni, zilizozalishwa kwa ajili ya matumizi katika majokofu, viyoyozi, uzalishaji wa magodoro, dawa za kuulia wadudu, vidhibiti moto na vimumunyishaji;
- "Marekebisho ya Kigali" maana yake ni marekebisho ya Itifaki ya Montreal ya kupunguza uzalishaji na matumizi ya hidrofluorokaboni (HFC);
- "mmiliki wa leseni" maana yake ni mtu mwenye leseni ya kukarabati viyoyozi au majokofu au viyoyozi vya magari vyenye kemikali zinazodhibitiwa na

- vifaa vingine vinavyodhibitiwa chini ya Kanuni hizi;
- "Waziri" maana yake ni Waziri mwenye dhamana ya Mazingira;
- "tabaka la ozoni" maana yake ni tabaka la ukanda wa angahewa linalozuia mionzi ya jua kufika moja kwa moja kwenye uso wa dunia;
- "nchi mwanachama" maana yake ni nchi yoyote ambayo imeridhia Itifaki;
- "kibali" maana yake ni idhini iliyotolewa kwa ajili ya kuingiza nchini au kusafirisha nje ya nchi au kuzalisha kemikali au vifaa vinavyothibitiwa chini ya Kanuni hizi;
- "kupunguza" maana yake ni kupunguza uzalishaji na matumizi ya kemikali na vifaa vinavyodhibitiwa chini ya Kanuni hizi;
- "ukomo" maana yake ni kusitisha uzalishaji na matumizi ya kemikali na vifaa vinavyodhibitiwa chini ya Kanuni hizi;
- "tarehe za zuio" maana yake ni muda wa usitishwaji wa uzalishaji na matumizi ya kemikali na vifaa vinavyodhibitiwa kama ulivyoainishwa kwenye Jedwali la Tatu;

"Itifaki" maana yake ni Itifaki ya Montreal kuhusu Kemikali Zinazomong'onyoa Tabaka la Ozoni ya Mwaka 1987;

"kurejesha kemikali zinazodhibitiwa katika viwango vya ubora" maana yake ni kemikali zilizorejeshwa au kuchakatwa upya kwa njia ya kuzichuja, kukausha, kukeneka, kutibiwa ili kufikia viwango vya ubora vinavyokubalika kitaalamu ili ziweze kutumika tena;

"kupata tena kemikali" kuhusiana na kemikali zinazodhibitiwa maana yake ni-

- (a) kukusanya kemikali baada ya matumizi; au
- (b) kukusanya kemikali kutoka katika mashine, kifaa au kasha wakati wa kukarabati au kabla ya kuliteketeteza.

"rejeleza" kuhusiana na kemikali zinazodhibitiwa maana yake ni kupata tena kemikali au kurejesha kemikali katika ubora ulioidhinishwa kwa njia kama vile kuchuja, kukausha pamoja na kutumia tena kifaa kilichoongezewa chaji.

Sura 182

"Msajili wa Kemikali" maana yake ni Msajili wa Kemikali aliyeteuliwa kwa mujibu wa Kifungu cha 9 cha Sheria ya Usimamizi na Udhibiti Kemikali za Viwandani na Majumbani;

Lengo

4. Lengo la Kanuni hizi ni-

- (a) kusitisha uzalishaji na matumizi ya kemikali zinazomong'onyoa tabaka la ozoni kwa mujibu wa ratiba ya ukomo iliyoainishwa kwenye Itifaki na Marekebisho mengine yatakayofanyika;
- (b) kudhibiti uzalishaji na matumizi ya hidrofluorokaboni zenye uwezo mkubwa wa kuchangia ongezeko la joto duniani kwa mujibu wa ratiba ya upunguzaji wa matumizi kama ilivyoainishwa katika Marekebisho ya Kigali;
- (c) kusimamia uzalishaji, uingizaji nchini, usafirishaji nje ya nchi, upitishaji nchini, usafirishaji, biashara, uteketezaji na matumizi ya kemikali zinazomong'onyoa tabaka la ozoni, hidrofluorokaboni zenye uwezo mkubwa wa kuchangia ongezeko la joto duniani na vifaa vyenye, au vilivyotengenezwa au vinavyotegemea au vilivyosanifiwa kutumia kemikali zinazodhibitiwa;
- (d) kudhibiti na kufuatilia kiasi cha kemikali zinazomong'onyoa tabaka la ozoni na hidrofluorokaboni zenye uwezo mkubwa wa kuchangia ongezeko la joto duniani zinazoingizwa nchini au kusafirishaji nje ya nchi na kuweka mfumo wa ukusanyaji wa takwimu

- ambao utawezesha uzingatiaji wa matakwa ya utoaji taarifa kwa mujibu wa Itifaki;
- (e) kuhamasisha mikakati, programu, motisha, matumizi ya vifaa na teknolojia rafiki kwa tabaka la ozoni pamoja na kemikali na vifaa vyenye uwezo mdogo wa kuchangia ongezeko la joto duniani vinavyoendana na jukumu la kitaifa liloainishwa kwenye Itifaki na Marekebisho ya Kigali; na
- (f) kuwezesha mawasiliano kati ya Kitengo cha Ozoni cha Taifa na Sekretariati ya Itifaki.

SEHEMU YA II ZUIO LA KEMIKALI NA VIFAA VINAVYODHIBITIWA

Zuio la Kemikali Zinazomong'o nyoa Tabaka la Ozoni na Hidrofluoroka boni

Sura 182

5. (1) Mtu hataruhusiwa kuzalisha, kuingiza nchini, kusafirisha nje ya nchi, kuuza, au kutoa tangazo la kuuza kemikali zinazodhibitiwa zilizoorodheshwa kwenye Jedwali la Pili na la Tatu bila ya kibali kilichotolewa na Msajili wa Kemikali chini ya Sheria ya Usimamizi na Udhibiti wa Kemikali za Viwandani na Majumbani.

Sura 130

(2) Mtu hataruhusiwa kuzalisha, kuingiza nchini, kusafirisha nje ya nchi, kuuza, kuwa na nia ya kuuza vifaa vyenye kemikali zinazodhibitiwa zilizoorodheshwa kwenye Jedwali la Pili na la Tatu bila

ya kibali kilichotolewa na Mkurugenzi Mkuu wa Shirika la Viwango Tanzania chini ya Sheria ya Viwango.

- (3) Kitengo cha Ozoni cha Taifa kitabainisha kiasi cha kemikali na idadi ya vifaa vinavyodhibitiwa vinavyopaswa kupewa kibali cha kuingizwa nchini au kusafirishwa nje ya nchi kwa mujibu wa Kanuni hizi.
- (4) Mtu hataruhusiwa kuingiza nchini au kusafirisha nje ya nchi kemikali au vifaa vinavyodhibitiwa kwa nchi ambayo sio mwanachama wa Itifaki.
- (5) Waziri atachapisha majina ya nchi ambazo Serikali zao hazijaridhia Itifaki na Marekebisho yake katika vipindi mbalimbali.
- (6) Mtu yeyote atakayekiuka masharti ya kanuni ndogo ya (1), (2) na (4), atakuwa ametenda kosa na akipatikana na hatia, atatozwa faini isiyopungua shilingi laki tano na isiyozidi shilingi milioni hamsini au kifungo kisichopungua miezi mitatu na kisichozidi miaka saba au vyote kwa pamoja.

Wajibu wa kuzingatia masharti ya Kanuni

- 6. (1) Mtu anayejihusisha na kemikali zinazodhibitiwa au urejeshaji wa kemikali hizi atapaswa kuzingatia masharti ya Kanuni hizi.
- (2) Mtu yeyote atakayekiuka masharti ya kanuni hii atakuwa ametenda kosa na akipatikana na hatia,

atatozwa faini isiyopungua shilingi laki tano na isiyozidi shilingi milioni hamsini au kifungo kisichopungua miezi mitatu na kisichozidi miaka saba au vyote kwa pamoja.

Tarehe za zuio la kemikali zinazodhibitiwa

- 7. (1) Mtu hataruhusiwa kuzalisha, kuingiza nchini au kusafirisha nje ya nchi kemikali zinazodhibitiwa zilizoorodheshwa kwenye Jedwali la Tatu la Kanuni hizi baada ya tarehe za zuio zilizoainishwa.
- (2) Mtu yeyote atakayekiuka masharti ya kanuni hizi, atakuwa ametenda kosa na akipatikana na hatia, atatozwa faini isiyopungua shilingi laki tano na isiyozidi shilingi milioni hamsini au kifungo kisichopungua miezi mitatu na kisichozidi miaka saba au vyote kwa pamoja.

Udhibiti wa uingizaji nchini wa baadhi ya kemikali na vifaa

- 8. (1) Waziri atashauriana na Waziri mwenye dhamana ya fedha na Waziri mwenye dhamana ya biashara kuainisha hatua za kikodi katika kudhibiti uingizaji wa majokofu na viyoyozi vipya au vilivyotumika ambavyo vimesanifiwa kutumia kemikali za hidrokrolofluorokaboni jamii ya R-22 au hidrofluorokaboni kama kipoza joto.
- (2) Kulingana na kanuni ndogo ya (1), majokofu na viyoyozi vipya au vilivyotumika ambavyo vimesanifiwa kutumia kemikali za hidrokrolofluorokaboni jamii ya (R-22) kama kipoza

joto havitaruhusiwa kuingizwa nchini ifikapo mwaka 2025.

Zuio la matumizi ya haloni.

- 9. (1) Mtu hataruhusiwa-
 - (a) kutumia haloni wakati wa kuzima moto, au wakati wa mazoezi ya kujiandaa kuzima moto; au
 - (b) kujaza tena mifumo ya kuzima moto kwa kutumia haloni mpya; au
 - (c) kuuza vizima moto vyenye haloni.
- (2) Bila kujali masharti ya kanuni ndogo ya (1), sekta za usafiri wa anga na jeshi wanaweza kuendelea kutumia akiba ya haloni iliyorejelezwa kwa ajili ya usalama dhidi ya moto.
- (3) Mtu yeyote atakayekiuka masharti ya kanuni ndogo ya (1), atakuwa ametenda kosa na akipatikana na hatia, atatozwa faini isiyopungua shilingi laki tano na isiyozidi shilingi milioni hamsini au kifungo kisichopungua miezi mitatu na kisichozidi miaka saba au vyote kwa pamoja.

Kitengo cha Taifa cha Ozoni.

10. (1) Mkurugenzi atakuwa Kitengo cha Ozoni cha Taifa, na kwa mamlaka yake kama Mkurugenzi atashirikiana na vitengo vya kisekta vya mazingira-

- (a) kusimamia programu za kitaifa kuhusu kemikali na vifaa vinavyodhibitiwa;
- (b) kuandaa sera, mikakati na taratibu nyingine kwa ajili ya kusitisha kemikali na vifaa vinavyodhibitiwa;
- (c) kushauri na kuwezesha viwanda, sekta za ukarabati na watumiaji katika kusitisha matumizi ya kemikali na vifaa vilivyodhibitiwa;
- (d) kuhamasisha jitihada za urejelezaji wa kemikali zinazodhibitiwa; na
- (e) kuandaa na kutunza takwimu zinazohitajika kwa ajili ya kutoa taarifa katika Sekretariati ya Itifaki.

SEHEMU YA III UZINGATIAJI NA UTEKELEZAJI

Mamlaka ya wakaguzi wa kemikali

Sura 182

11. Mkaguzi wa kemikali atasimamia kemikali zinazodhibitiwa kwa kutumia mamlaka yake kama yalivyoainishwa kwenye Sheria ya Usimamizi na Udhibiti ya kemikali za Viwandani na Majumbani.

Mamlaka ya wakaguzi wa mazingira

Sura 191

12. Mkaguzi wa mazingira atatumia mamlaka yake kama yalivyoainishwa kwenye Sheria na Kanuni hizi.

Makosa yanayohusiana na mkaguzi wa kemikali au mazingira

13. Mtu ambaye-

- (a) anamzuia kwa makusudi mtu mwingine kufika mbele ya mkaguzi wa kemikali au mazingira au ofisa mwingine yeyote aliyeidhinishwa kujibu swali lolote ambalo mkaguzi wa kemikali au afisa mwingine yeyote anaweza akahitaji majibu;
- (b) anaweza kumzuia kwa makusudi mkaguzi wa kemikali au mazingira au ofisa mwingine yeyote aliyeidhinishwa katika kufanya au kutekeleza mamlaka au majukumu yake;
- (c) kwa nia ya udanganyifu atajifanya kuwa mkaguzi wa kemikali au mazingira au ofisa aliyeidhinishwa;
- (d) atamkatalia mkaguzi wa kemikali au mazingira kuingia katika ardhi au eneo lolote ambalo amepewa mamlaka ya kuingia kwa mujibu wa Kanuni hizi;
- (e) atajifanya mkaguzi wa kemikali au mazingira;

- (f) atamkatalia mkaguzi wa kemikali au mazingira kupata kumbukumbu zilizotunzwa kwa mujibu wa Sheria na Kanuni hizi;
- (g) atatoa taarifa za uwongo au za kumpotosha mkaguzi wa kemikali au mazingira;

atakuwa ametenda kosa na akipatikana na hatia, atatozwa faini isiyopungua shilingi laki tano na isiyozidi shilingi milioni hamsini au kifungo kisichopungua miezi mitatu na kisichozidi miaka saba au vyote kwa pamoja.

Amri ya dharura ya kulinda mazingira

Sura 191

14. (1) Mkaguzi wa mazingira atakayegundua au kupokea taarifa kuhusu ukiukwaji wa Kanuni hizi anaweza kutoa amri ya dharura kwa mujibu wa masharti yaliyoainishwa kwenye Sheria.

(2) Bila kuathiri matakwa ya kanuni ndogo ya

(1) mkaguzi wa kemikali atakayegundua au kupokea
Sura 182 taarifa kuhusu ukiukwaji wa Kanuni hizi, anaweza
kuchukua hatua stahiki kwa mujibu wa masharti ya
Sheria ya Usimamizi na Udhibiti wa kemikali za

Viwandani na Majumbani.

Majukumu ya vitengo vya kisekta vya mazingira

- 15. Waratibu wa Mazingira wa Kisekta-
 - (a) wataanzisha taratibu na shughuli zinazohusu usitishaji wa kemikali na vifaa vinavyodhibitiwa

- vilivyoorodheshwa kwenye Jedwali la Kwanza na la Pili;
- (b) watashirikiana na Kitengo cha Ozoni cha Taifa katika kutekeleza malengo ya Kanuni hizi; na
- (c) watawasilisha kwenye Kitengo cha Ozoni cha Taifa mipango kazi na taarifa za utekelezaji za mwaka.

Majukumu ya Mtaalamu wa Usimamizi wa Mazingira wa Mkoa

- Mtaalamu wa Usimamizi wa Mazingira wa Mkoa atatakiwa-
 - (a) kuwa kiungo kati ya Kitengo cha Ozoni cha Taifa na Mamlaka za Serikali za Mitaa katika kutekeleza Kanuni hizi;
 - (b) kuzishauri mamlaka za serikali za mitaa kuhusu utekelezaji wa maaagizo au maelekezo yoyote kutoka kwa Mkurugenzi kuhusiana na Kanuni hizi; na
 - (c) kuzishauri mamlaka za serikali za mitaa zilizo chini ya mamlaka yake ya kiutawala pamoja na wakaguzi wa mazingira kuhusu uzingatiaji na utekelezaji wa Kanuni hizi.

Majukumu ya Ofisa Usimamizi wa Mazingira wa 17. Ofisa Usimamizi wa Mazingira wa Halmashauri za Jiji, Manispaa, Wilaya na Mji atatakiwa-

Halmashauri za Jiji, n.k

- (a) kuhakikisha utekelezaji wa Kanuni hizi katika eneo lake la utawala;
- (b) kuishauri Kamati ya Mazingira iliyo katika eneo lake la utawala kuhusu masuala yote ya utekelezaji na usimamizi wa Kanuni hizi;
- (c) kutekeleza majukumu mengine atakayopewa na Kitengo cha Ozoni cha Taifa katika vipindi mbalimbali.

Kiasi na kiwango cha uingizaji nchini au usafirishaji nje wa kemikali au vifaa

- 18. (1) Kitengo cha Ozoni cha Taifa kitashirikiana na Msajili wa Kemikali na Mkurugenzi Mkuu wa Shirika la Viwango Tanzania kubainisha kiasi na kiwango cha kemikali na vifaa vinavyodhibitiwa kitakachoingizwa nchini au kusafirishwa nje ya nchi;
- (2) Kitengo cha Ozoni cha Taifa kitashirikiana na Kamishna wa Forodha kuandaa taaarifa kuhusu takwimu za kiasi cha kemikali na vifaa vinavyodhibitiwa vinavyoingizwa nchini, kusafirishwa nje ya nchi au kupitishwa nchini;
- (3) Kwa mujibu wa kanuni ndogo ya (1), mtu yeyote hatatakiwa kuzidisha ukomo wa kiasi cha kemikali na idadi ya vifaa vinavyodhibitiwa wakati wa kusafirisha nje ya nchi au kuingiza nchini;

- (4) Mtu yeyote hataruhusiwa kuzalisha, kuingiza nchini au kusafirisha nje ya nchi kemikali na vifaa vinavyodhibitiwa isipokuwa kama vinazingatia kiwango cha ubora kilichoainishwa na Shirika la Viwango Tanzania
- (5) Mtu yeyote atakayekiuka masharti ya kanuni ndogo ya (3) na (4) atakuwa ametenda kosa na akipatikana na hatia, atatozwa faini isiyopungua shilingi laki tano na isiyozidi shilingi milioni hamsini au kifungo kisichopungua miezi mitatu na kisichozidi miaka saba au vyote kwa pamoja.

Maombi ya kibali

Sura 182

Sura 130

19. (1) Mtu yeyote anayekusudia kuingiza nchini au kusafirisha nje ya nchi kemikali zinazodhibitiwa zilizoorodheshwa kwenye Jedwali la Pili na la Tatu atawasilisha maombi kwa Msajili wa Kemikali kwa mujibu wa Sheria ya Usimamizi na Udhibiti wa kemikali za Viwandani na Majumbani

(2) Mtu yeyote anayekusudia kuingiza nchini au kusafirisha nje ya nchi vifaa vinavydhibitiwa vilivyoorodheshwa kwenye Jedwali la Kwanza atawasilisha maombi kwa Mkurugenzi Mkuu wa Shirika la Viwango Tanzania kwa mujibu wa Sheria ya Viwango.

(3) Msajili wa Kemikali na Mkurugenzi Mkuu wa Shirika la Viwango Tanzania watatoa miongozo kwa Kamishna wa Forodha kuhusu uingizaji nchini au usafirishaji nje ya nchi wa kemikali na vifaa vinavyodhibitiwa.

Miundombinu sahihi na vifaa vya kutosha kabla ya kibali kutolewa

- 20. (1) Msajili wa Kemikali atatoa kibali cha kuingiza nchini au kusafirisha nje ya nchi kemikali zinazodhibitiwa endapo atajiridhisha kwamba mwombaji ana miundombinu na vifaa sahihi na vya kutosha vya kushughulikia kemikali zinazodhibitiwa bila kuleta madhara katika mazingira.
- (2)Msajili wa Kemikali, katika kutoa kibali chini ya Kanuni hizi atatakiwa kuzingatia tarehe za ukomo zilizoainishwa kwenye Jedwali la Tatu.

Kumbukumbu za kemikali zinazodhibitiwa

Sura 182

- 21. (1) Mtu yeyote mwenye kibali cha kushughulikia kemikali zinazodhibitiwa atatakiwa kutunza na kuwasilisha kumbukumbu za kiasi cha kemikali zinazodhibitiwa alizoingiza nchini, alizosafirisha nje ya nchi, alizohifadhi, alizotumia au alizouza kwa mujibu wa Sheria ya Usimamizi na Udhibiti wa Kemikali za Viwandani na Majumbani.
- (2) Msajili wa kemikali atatakiwa kuwasilisha mara mbili kwa mwaka taarifa za kemikali

zinazodhibitiwa zilizoingizwa nchini, zilizosafirishwa nje ya nchi. zilizopitishwa nchini, zilizohifadhiwa, zilizotumika au kuuzwa kwa kutumia mpangilio ulioainishwa kwenye Jedwali la Nne.

(3) Mtu yeyote atakayekiuka masharti ya kanuni ndogo ya (1) atakuwa ametenda kosa na akipatikana na hatia, atatozwa faini isiyopungua shilingi laki tano na isiyozidi shilingi milioni hamsini au kifungo kisichopungua miezi mitatu na kisichozidi miaka saba au vyote kwa pamoja.

Kumbukumbu za vifaa vinavyodhibitiwa

Sura 130

- 22. (1) Mtu yeyote mwenye kibali cha kushughulikia vifaa vinavyodhibitiwa atatakiwa kutunza na kuwasilisha kumbukumbu za kiasi cha vinavyodhibitiwa alivyoingiza vifaa nchini, alivyosafirisha nje nchi, alivyohifadhi, ya alivyotumia au alivyouza kwa mujibu wa Sheria ya Viwango.
- (2) Mkurugenzi Mkuu wa Shirika la Viwango Tanzania atatakiwa kuwasilisha mara mbili kwa mwaka taarifa za vifaa vinavyodhibitiwa vilivyoingizwa nchini, vilivyosafirishwa nje ya nchi, vilivyopitishwa nchini, vilivyohifadhiwa, vilivyotumika au kuuzwa kwa kutumia mpangilio ulioainishwa kwenye Jedwali la Nne.

(3) Mtu yeyote atakayekiuka masharti ya kanuni ndogo ya (1) atakuwa ametenda kosa na akipatikana na hatia, atatozwa faini isiyopungua shilingi laki tano na isiyozidi shilingi milioni hamsini au kifungo kisichopungua miezi mitatu na kisichozidi miaka saba au vyote kwa pamoja.

Wajibu wa kutunza kumbukumbu

- 23. (1) Mtu yeyote anayeingiza nchini, kusafirisha nje ya nchi, kusambaza au kuuza kemikali au vifaa vinavyodhibitiwa atatakiwa kuwa na kumbukumbu katika ofisi yake iliyosajiliwa zinazoonesha-
 - (a) taarifa kuhusu usambazaji, mauzo na matumizi;
 - (b) kumbukumbu za-
 - (i) kiasi halisi cha kila aina ya kemikali au kifaa kinachodhibitiwa kilichonunuliwa kutoka kwa msambazaji, muuzaji wa jumla au wakala wa nchini Tanzania;
 - (ii) kiasi halisi cha kila aina ya kemikali au kifaa kinachodhibitiwa kilichotumika na kundi la mtumiaji au madhumuni ya matumizi;
 - (iii) kiasi halisi cha kila aina ya kemikali au kifaa kinachodhibitiwa kilichouzwa na

majina na anwani ya mnunuzi na tamko lililotiwa saini na mnunuzi;

- (c) taarifa kuhusu-
 - (i) kiasi halisi cha kila aina ya kemikali au kifaa kinachodhibitiwa kilichoingizwa nchini kwa kila shehena:
 - (ii) jina na anwani za msambazaji;
- (iii) namba ya kumbukumbu ya shehena iliyoingizwa nchini;
- (d) nakala ya hati ya kusafirishia shehena,ankara na nyaraka zilizowasilishwaMamlaka ya Mapato Tanzania na taasisinyingine zinazohusika kwa kila shehena;
- (e) taarifa kuhusu-
 - (i) kiasi halisi cha kila aina ya kemikali au kifaa kinachodhibitiwa kilichosafirishwa nje ya nchi kwa kila shehena;
 - (ii) bandari ambayo kemikali au kifaa kinachodhibitiwa kilichosafirishwa nje ya nchi kilipakiwa;
 - (iii) nchi mwanachama ambayo kemikali au kifaa kinachodhibitiwa kilipelekwa na jina na anwani ya mpokeaji; au
 - (iv) madhumuni ya kusafirisha nje ya nchi kemikali au kifaa kinachodhibitiwa.

- (2) Kamishna wa Forodha atatuma kwenye Kitengo cha Ozoni cha Taifa taarifa za mwaka zinazoonesha usafirishaji nje ya nchi, uingizaji nchini na upitishaji nchini wa kemikali au vifaa vinavyodhibitiwa.
- (3) Kitengo cha Ozoni cha Taifa kitahifadhi na kutunza kumbukumbu kwa namna ambayo italinda siri ya kumbukumbu hizo.
- (4) Kumbukumbu zilizohifadhiwa na kutunzwa kwa mujibu wa kanuni hii zitakuwa kumbukumbu za umma na kwa kuzingatia usiri wa kumbukumbu hizo; na kwa kadri mazingira yanavyoelekeza; na baada ya malipo ya ada iliyoainishwa, mhusika ataruhusiwa kuzipata kwa mujibu wa Sheria.
- (5) Kitengo cha Ozoni cha Taifa kinaweza kutumia kumbukumbu na taarifa zilizopatikana chini ya kanuni hii kwa ajili ya kuzingatia matakwa ya utoaji wa taarifa kwa Sekretariati ya Itifaki.
- (6) Mtu atakayekiuka masharti ya kanuni ndogo ya (1) atakuwa ametenda kosa na akipatikana na hatia, atatozwa faini isiyopungua shilingi laki tano na isiyozidi shilingi milioni hamsini au kifungo kisichopungua miezi mitatu na kisichozidi miaka saba au vyote kwa pamoja.

Uthibitishaji wa forodha na uwekaji alama ya utambulisho

- 24. (1) Mtu ambaye anaingiza nchini au kusafirisha nje ya nchi kemikali au vifaa vinavyodhibitiwa atawasilisha bidhaa hizo kwenye eneo la forodha kwa ajili ya ukaguzi wa mamlaka zinazohusika ili kutbhibitisha iwapo bidhaa hizo zimetengenezwa au zimesanifiwa kwa kemikali zinazodhibitiwa.
- (2)Mtu anayeingiza nchini au kuuza kemikali au kifaa chochote kinachodhibitiwa atahakikisha kasha lenye kemikali au kifaa kinachodhibitiwa limewekewa alama inayoonekana; kwa lugha inayoeleweka ikiwa na-
 - (a) jina la kemikali au kifaa kinachodhibitiwa;
 - (b) jina na anwani ya mzalishaji;
 - (c) nchi ilikotoka;
 - (d) maelezo ya kemikali na namba ya usajili;
 - (e) maelezo yanayoonekana wazi:

"KEMIKALI/KIFAA HIKI NI HATARI KWA TABAKA LA OZONI AU KINAWEZA KUSABABISHA ONGEZEKO LA JOTO DUNIANI"

(3) Mtu anayeingiza nchini au kuuza kemikali au kifaa chochote kinachodhibitiwa atahakikisha kwamba bidhaa inakidhi mifumo ya kimataifa ya uwekaji alama za utambulisho.

(4) Mtu atakayekiuka masharti ya kanuni hii, atakuwa ametenda kosa na akipatikana na hatia, atatozwa faini isiyopungua shilingi laki tano na isiyozidi shilingi milioni hamsini au kifungo kisichopungua miezi mitatu na kisichozidi miaka saba au vyote kwa pamoja.

Elimu na mafunzo kwa umma

- 25. (1) Kitengo cha Ozoni cha Taifa kinaweza kuzishirikisha mamlaka husika na wadau kuendesha programu na shughuli za utoaji elimu kwa umma kuhusu usitishaji wa kemikali na vifaa vinavyodhibitiwa.
- (2) Kitengo cha Ozoni cha Taifa kitahakikisha mafunzo yanatolewa kwa mafundi mchundo wanaojihusisha na utengenezaji, ukarabati au uteketetezaji wa vifaa vyenye kemikali zinazodhibitiwa kwa kuzingatia miongozo inayotolewa na Waziri.

Motisha kwa kupunguza na kusitisha matumizi ya kemikali na vifaa vinavyodhibitiwa 26. Waziri kwa kushauriana na Waziri mwenye dhamana ya fedha anaweza kuandaa miongozo kuhusu nyenzo za kiuchumi zitakazotoa motisha za kiuchumi na kikodi kwa ajili ya kuchochea upunguzaji na usitishaji wa matumizi ya kemikali na vifaa vinavyodhibitiwa.

Majukumu ya Maofisa Forodha

- 27. Ofisa Forodha atakuwa na majukumu ya-
 - (a) kuzuia uingizaji nchini, usafirishaji nje ya nchi na au upitishaji nchini wa kemikali na vifaa vinavyodhibitiwa kinyume cha sheria;
 - (b) kubaini iwapo vifaa vilivyoingizwa nchini au kusafirishwa nje ya nchi vina kemikali zinazodhibitiwa; na
 - (c) kutambua uwekaji alamu usiosahihi na nyaraka za uwongo za kemikali na vifaa vinavyodhibitiwa na kuchukua hatua stahiki.

Kuendana na mabadiliko ya teknolojia

28. Kitengo cha Ozoni cha Taifa ama chenyewe au kwa kushirikiana na wadau muhimu kitafuatilia kwa ukaribu mabadiliko ya teknolojia na mbinu za kupunguza utegemezi wa matumizi ya kemikali na vifaa vinavyodhibitiwa.

Wajibu wa kutoa taarifa

- 29. (1) Kwa madhumuni ya kuwezesha udhibiti madhubuti wa kemikali na vifaa vinavyodhibitiwa, Waziri anaweza kumtaka mtu au taasisi yoyote kuwasilisha taarifa yoyote ama kwa Kitengo cha Ozoni cha Taifa au kwa mtu yeyote aliyeidhinishwa.
- (2) Mtu atakayekiuka masharti ya kanuni ndogo ya (1), atakuwa ametenda kosa na akipatikana na hatia,

atatozwa faini isiyopungua shilingi laki tano na isiyozidi shilingi milioni hamsini au kifungo kisichopungua miezi mitatu na kisichozidi miaka saba au vyote kwa pamoja.

SEHEMU YA IV

VIFAA VYENYE KEMIKALI ZINAZODHIBITIWA

Ukarabati wa vifaa vyenye kemikali zinazodhibitiwa

- 30. (1) Mtu au taasisi haitakarabati vifaa vilivyoorodhesha kwenye Jedwali la Kwanza isipokuwa kama inatambulika na mamlaka husika.
- (2)Mkurufunzi au mwanafunzi ataruhusiwa kukarabati vifaa vilivyoorodhesha kwenye Jedwali la Kwanza kama atakuwa chini ya usimamizi wa mtu mwenye leseni.
- (3)Leseni ya biashara ya kukarabati vifaa vilivyoorodhesha kwenye Jedwali la Kwanza itatolewa kwa karakana zinazotambuliwa kwa mujibu wa masharti ya Kanuni hizi tu.

Sifa za kukarabati vifaa vyenye kemikali zinazodhibitiwa

- 31. Mtu hatakarabati vifaa vilivyoorodhesha kwenye Jedwali la Kwanza isipokuwa kama
 - cheti cha kukarabati vifaa (a) ana vilivyoorodhesha kwenye Jedwali la Kwanza kilichotolewa na taasisi inayotambulika na kuidhinishwa na taasisi yenye dhamana elimu ya ya

- ufundi na mafunzo ya ufundi stadi au mamlaka yoyote nyingine inayotambulika;
- (b) ni mwanagenzi ambaye anasimamiwa na mtu mwenye ujuzi na viwango vinavyotambuliwa na taasisi yenye dhamana ya elimu ya ufundi na mafunzo ya ufundi stadi au mamlaka yoyote nyingine inayotambulika;
- (c) ana cheti cha kukarabati vifaa vyenye kemikali zinazodhibitiwa au kurejeleza kemikali zinazodhibitiwa;
- (d) ana ujuzi alioupata chini ya usimamizi wa mtu mwenye ujuzi na viwango vinavyotambuliwa na taasisi yenye dhamana ya elimu ya ufundi na mafunzo ya ufundi stadi au mamlaka yoyote nyingine inayotambulika; au
- (e) amehitimu mafunzo na kozi nyingine yoyote iliyothibitishwa na taasisi yenye dhamana ya elimu ya ufundi na mafunzo ya ufundi stadi au mamlaka yoyote nyingine inayotambulika.

Majukumu ya wamiliki wa biashara 32. Mtu anayemiliki biashara za kukarabati vifaa vilivyoorodhesha kwenye Jedwali la Kwanza

atahakikisha kwamba wafanyakazi wake wana sifa zilizoainishwa chini ya Kanuni ya 31.

SEHEMU YA V

UTEKETEZAJI WA VIFAA VYENYE KEMIKALI ZINAZODHIBITIWA

Uteketezaji wa vifaa vyenye kemikali zinazodhibitiwa

T.S Na.388 ya Mwaka 2021 T.S Na.389 ya Mwaka 2021

- 33. (1) Mtu anayekusudia kuteketeza kifaa chenye kemikali zinazodhibitiwa atazingatia masharti yaliyoainishwa kwenye Kanuni za Usimamizi wa Mazingira (Usimamizi na Udhibiti wa Taka Hatarishi) za Mwaka 2021 na Kanuni za Usimamizi wa Mazingira (Usimamizi na Udhibiti wa Taka za Kielektroniki) za Mwaka 2021.
- (2) Mtu atakayekiuka masharti ya kanuni hii, atakuwa ametenda kosa na akipatikana na hatia, atatozwa faini isiyopungua shilingi milioni tano na isiyozidi shilingi bilioni kumi au kifungo kisichopungua miezi mitatu na kisichozidi miaka kumi na miwili au vyote kwa pamoja.

SEHEMU YA VI MASHARTI MENGINEYO

Makosa yanayotendwa na kampuni 34. (1) Pale ambapo kosa chini ya Kanuni hizi limefanywa na kampuni na linaonekana kuwa limefanyika kwa kukusudia au kupuuza, au kusababishwa na uzembe, mkurugenzi, meneja, katibu

au ofisa mwingine wa kampuni, au mtu mwingine yeyote anayekaimu nafasi hizo, mhusika, pamoja na kampuni, watakuwa na hatia na watawajibika na kuadhibiwa ipasavyo.

(2) Pale ambapo shughuli za kampuni zinasimamiwa na wanahisa, kanuni ndogo ya (1) itatumika kwa mwanahisa yeyote kuhusiana na makosa aliyotenda au kupuuza wajibu wake kulingana na nafasi aliyonayo kwenye kampuni kana kwamba alikuwa mtendaji mkuu wa kampuni.

Amri za mahakama

- 35. Mahakama inayomtia hatiani mtuhumiwa chini ya Kanuni hizi, pamoja na faini iliyoainishwa chini ya Kanuni hizi, inaweza kutoa amri kwamba-
 - (a) kibali kisitishwe kwa kipindi kilichoainishwa katika amri au kifutwe; au
 - (b) kemikali au kifaa kinachodhibitiwa ambacho ni kiini cha kosa, kitaifishwe na kuteketezwa kwa namna ambayo haitaathiri mazingira.

Rufaa

Sura 191

36. Mtu ambaye hataridhishwa na uamuzi wowote chini ya Kanuni hizi anaweza kukata rufaa kwa mujibu wa Sheria.

Kanuni Za Usimamizi Wa Mazingira (Usimamizi Na Udhibiti wa Kemikali Zinazomong'onyoa Tabaka la Ozoni Na Hidrofluorokaboni)

Tangazo la Serikali Na. 582 (Linaendelea.)

Kufutwa kwa T.S Na. 240 la Mwaka 2007 37. Kanuni za Usimamizi wa Mazingira (Usimamizi na Udhibiti wa Kemikali Zinazomong'onyoa Tabaka la Ozoni) za Mwaka 2007 zinafutwa.

MAJEDWALI

Kanuni Za Usimamizi Wa Mazingira (Usimamizi Na Udhibiti wa Kemikali Zinazomong'onyoa Tabaka la Ozoni Na Hidrofluorokaboni)

Tangazo la Serikali Na. 582 (Linaendelea.)

JEDWALI LA KWANZA

(Limetengenezwa chini ya Kanuni ya 2(a) (i))

VIFAA VYENYE KEMIKALI ZINAZOMONG'ONYOA TABAKA LA OZONI NA VIFAA VYENYE HIDROFLUOROKABONI ZENYE UWEZO WA KUCHANGIA ONGEZEKO LA JOTO DUNIANI

- 1. Viyoyozi vya mitambo jongevu na magari (ama vikiwa ndani ya magari au vinginevyo).
- 2. Majokofu na viyoyozi kwa matumizi ya majumbani na biashara au pampu joto zikiwa na kemikali zinazodhibitiwa kama kipoza joto au vifaa vya kuzuia joto au baridi kutoka, ikiwemo-
 - (a) Majokofu;
 - (b) Friza;
 - (c) Viondoa unyevu;
 - (d) Vipooza maji;
 - (e) Mashine za kutengeneza barafu; na
 - (f) Viyoyozi na pampu joto.
 - 3. Vifaa vya kufukiza.
 - 4. Vifaa vya kuzimia moto.
 - 5. Kizuia baridi/joto, paneli na mifuniko ya mabomba.
 - 6. Pre-polymers.

JEDWALI LA PILI

(Limetengenezwa chini ya Kanuni ya 2(a)(ii)

Orodha ya Hidrofluorokaboni zenye uwezo wa kuchangia ongezeko la joto duniani

Kundi	Aina ya kemikali	Uwezo wa kuchangia ongezeko la joto duniani katika kipindi cha miaka 100
Kundi la I		
CHF2CHF2	HFC-134	1,100
CH ₂ FCF ₃	HFC-134a	1,430
CH ₂ FCHF ₂	HFC-143	353
CHF2CH2CF3	HFC-245fa	1,030
CF3CH2CF2CH3	HFC-365mfc	794
CF3CHFCF3	HFC-227ea	3,220
CH2FCF2CF3	HFC-236cb	1,340
CHF2CHFCF3	HFC-236ea	1,370
CF3CH2CF3	HFC-236fa	9,810
CH2FCF2CHF2	HFC-245ca	693
CF3CHFCHFCF2CF3	HFC-43-10mee	1,640
CH ₂ F ₂	HFC-32	675
CHF ₂ CF ₃	HFC-125	3,500
CH ₃ CF ₃	HFC-143a	4,470
CH ₃ F	HFC-41	92
CH ₂ FCH ₂ F	HFC-152	53
CH ₃ CHF ₂	HFC-152a	124
Kundi la II		
CHF ₃	HFC-23	14,800

JEDWALI LA TATU

(Limetengenezwa chini ya Kanuni ya 5(1))

ORODHA YA KEMIKALI ZINAZODHIBITIWA NA TAREHE ZA ZUIO

	Aina	Kemikali Zinazodhibitiwa		Tarehe ya zuio la kuingiza nchini/Kusafirisha nje ya nchi
1.	Hydrobromofluorocarbons	(HBFCs)		Januari 1, 2002
2.	Chlorofluorocarbons	(CFCs) CFC – 113 CFC – 114	CFC – 115	Januari 1, 2010
3.	Halons halon 1211	halon 1301	halon 2402	Januari 1, 2010
4.	Other fully halogenated Chlorofluorocarbons (CFCs) CFC – 13 CFC – 111 CFC – 112 CFC – 217	CFC - 122 CFC - 213 CFC - 215	CFC – 212 CFC – 214 CFC – 216	Januari 1, 2010
5.	Carbon tetrachloride	Januari 1, 2010		
6.	1, 1, 1 – trichloroethane (methyl chloroform)			Januari 1, 2015
7.	Methyl bromide	Januari 1, 2015		
8.	Hydro chlorofluorocarbons (I	Januari 1, 2030		
9.	Hydrofluorocarbons (HFCs)	Januari 1, 2048		

JEDWALI LA NNE

(Limetengenezwa chini ya kanuni ya 20(2) na 21(2))

MPANGILIO WA TAARIFA YA NUSU MWAKA

1. Utangulizi

• Sura hii itaeleza wasifu wa jumla wa biashara au kampuni ikimujuisha eneo la biashara, shughuli zinazofanyika, taarifa za wafanyakazi na mapato ya mwaka.

Kanuni Za Usimamizi Wa Mazingira (Usimamizi Na Udhibiti wa Kemikali Zinazomong'onyoa Tabaka la Ozoni Na Hidrofluorokaboni)

Tangazo la Serikali Na. 582 (Linaendelea.)

- 2. Usimamizi wa kemikali/vifaa vinavyodhibitiwa
 - Sura hii itajumuisha taarifa zinazohusu usafirishaji nje ya nchi, uingizaji nchini, upitishaji nchini, usambazaji au matumizi ya kemikali au vifaa vinavyodhibitiwa. Taarifa zitakazotolewa zitakuwa kama ifuatavyo:
 - (i) jina na anwani ya mwingizaji nchini, msafirishaji nje ya nchi au mpitishaji nchini;
 - (ii) nchi mwanachama ambapo kemikali au kifaa kinachodhibitiwa kilipotoka au kupelekwa na jina na anwani ya mpokeaji;
 - (iii) kiasi halisi cha kemikali au vifaa vinavyodhibitiwa vilivyopitishwa nchini;
 - (iv) kiasi halisi cha kemikali au vifaa vinavyodhibitiwa vilivyoingizwa nchini au kusafirishwa nje ya nchi kwa kila shehena kwa kulinganisha na kiasi kilichoidhinishwa kwa ajili ya kuingizwa nchini au kusafirishwa nje ya nchi;
 - (v) bandari ambayo kemikali au kifaa kinachodhibitiwa kilichosafirishwa nje ya nchi kilipakiwa;
 - (vi) Majina ya wasambazaji (mtu binafsi au kampuni), mawasiliano, mahali na kaiasi cha kemikali au kifaa kilichodhibitiwa;
 - (vii) madhumuni ya kusafirisha nje ya nchi kemikali au kifaa kinachodhibitiwa;
 - (viii)taarifa za mtumiaji (jina, kiasi, mahali na matumizi)
- Changamoto

Sura hii itaelezea changamoto alizokabiliana nazo katika usimamizi wa kemikali na vifaa vinavyodhibitiwa.

- 4. Maoni na mapendekezo, kama yapo
- Viambatisho

Dodoma, 5 Agosti, 2022 SELEMANI SAIDI JAFO, Waziri wa nchi, Ofisi ya Makamu wa Rais Muungano na Mazingira